

NACRT

Na osnovu člana 22 Statuta Brčko distrikta Bosne i Hercegovine-prečišćeni tekst („Službeni glasnik Brčko distrikta Bosne i Hercegovine, broj: 2/10), Skupština Brčko distrikta Bosne i Hercegovine na ____ sjednici, održanoj dana ____ godine, usvaja

ZAKON O PRAVOBRANILAŠTVU BRČKO DISTRIKTA BOSNE I HERCEGOVINE

DIO PRVI - OSNOVNE ODREDBE

POGLAVLJE I - OSNOVNA NAČELA

Član 1 (Predmet)

Ovim zakonom uređuje se nadležnost i organizacija Pravobranilaštva Brčko distrikta Bosne i Hercegovine (u daljem tekstu: Pravobranilaštvo), izbor i imenovanje pravobranioaca i zamjenika pravobranioaca (u daljem tekstu: zamjenik), sukob interesa, funkcija, suspenzija, disciplinska odgovornost, položaj ostalih zaposlenih u Pravobranilaštvu, kao i druga pitanja vezana za rad Pravobranilaštva.

Član 2 (Cilj Zakona)

Cilj ovog zakona je da Pravobranilaštvo kao institucija osnovana zakonom, nezavisna od zakonodavnih, sudskih i izvršnih vlasti i od Policije, osigura da se imovina Brčko distrikta Bosne i Hercegovine (u daljem tekstu: Distrikt), koristi u skladu sa zakonom i da radnje koje Distrikt preduzima, kao i poslovi u kojima je Distrikt jedna od strana budu u skladu sa Statutom Brčko distrikta Bosne i Hercegovine (u daljem tekstu: Statut Distrikta) i zakonima, te da se uspostavi nezavisni i održivi mehanizam zaštite javne imovine, imovinskih prava i interesa Distrikta.

Član 3 (Načela ustavnosti i zakonitosti)

Pravobranilaštvo vrši svoju funkciju u skladu sa Ustavom Bosne i Hercegovine, Statutom Distrikta, kao i na osnovu zakona Bosne i Hercegovine, zakona Distrikta i drugih propisa.

Član 4
(Načelo samostalnosti i nezavisnosti)

- (1) Pravobranilaštvo samostalno obavlja svoju funkciju u vršenju svojih nadležnosti.
- (2) Pravobranilaštvo je nezavisno od zakonodavnih, sudskih i izvršnih vlasti i Policije i niko nema pravo da na bilo koji način utiče na Pravobranilaštvo u vršenju njegove funkcije.

Član 5
(Načelo odgovornosti)

Pravobranilaštvo je odgovorno za zakonito i pravilno zastupanje u zaštiti javne imovine, imovinskih prava i interesa zastupanih subjekata o čemu podnosi izvještaj i informacije u skladu sa zakonom.

Član 6
(Načelo javnosti)

- (1) Rad Pravobranilaštva je javan i svako može imati pristup informacijama u skladu sa zakonom.
- (2) Načelo javnosti ostvaruje se i podnošenjem polugodišnjeg i godišnjeg izvještaja o radu Skupštini Brčko distrikta Bosne i Hercegovine (u daljem tekstu: Skupština) i putem internet stranice Pravobranilaštva.
- (3) Ukoliko pravobranilac smatra da je to korisno može putem medija informisati javnost o stepenu zaštite javne imovine, imovinskih prava i interesa Distrikta.

Član 7
(Načelo ekonomičnosti i efikasnosti)

Pravobranilaštvo obavlja svoju funkciju na način koji zahtijeva najmanje troškova za zastupanog subjekta, Pravobranilaštvo i druge učesnike u postupku i dužno je da poslove iz svoje nadležnosti preduzima u što kraćem roku.

Član 8
(Zastupani subjekti)

Zastupani subjekti su Distrikt, njegovi organi, institucije, pravna lica koja se finansiraju u potpunosti ili pretežno iz budžeta Distrikta ili u odnosu na njih Distrikt vrši osnivačka prava i preduzeća u većinskom vlasništvu Distrikta.

Član 9
(Osnivanje i sjedište)

- (1) Pravobranilaštvo se osniva i ukida zakonom.
- (2) Sjedište Pravobranilaštva je u gradu Brčko.

Član 10
(Pečat)

(1) Pravobranilaštvo ima svoj pečat.

(2) Pečat Pravobranilaštva ima oblik kruga s promjerom 40 mm i sadrži tekst: „Bosna i Hercegovina, Brčko distrikt Bosne i Hercegovine, Pravobranilaštvo/Pravobraniteljstvo Brčko distrikta BiH“, ispisan latiničnim i ćiriličnim pismom s tim da su oba naziva u obliku koncentričnih krugova, koji neposredno okružuju grb Bosne i Hercegovine koji se nalazi u sredini pečata.

(3) Pravobranilaštvo može imati i manji pečat, promjera 25 mm, koji ima isti sadržaj pečata iz stava (2) ovog člana.

Član 11
(Rodna ravnopravnost)

Izrazi u ovom zakonu dati su u jednom gramatičkom rodu radi preglednosti i bez diskriminacije se odnose na muškarce i na žene.

DIO DRUGI- NADLEŽNOST I ORGANIZACIJA

POGLAVLJE I - NADLEŽNOST

Član 12
(Nadležnost za zastupanje)

(1) Kada se o pravima i obavezama zastupanih subjekata odlučuje u postupcima pred sudovima, arbitražama i drugim nadležnim organima, Pravobranilaštvo preduzima zakonom određene pravne radnje i mjere za zaštitu javne imovine, imovinskih prava i interesa zastupanih subjekata.

(2) Pravobranilaštvo može zastupati organe Distrikta koji su tuženi u upravnom sporu kada je povrijeđeno imovinsko pravo i interes Distrikta, ako ga oni na to ovlaste.

(3) Pravobranilaštvo može zastupati pravna lica koja se finansiraju u potpunosti ili pretežno iz budžeta Distrikta ili u odnosu na njih Distrikt vrši osnivačka prava i preduzeća u većinskom vlasništvu Distrikta, ako je to predviđeno aktom o osnivanju, osim radi naplate potraživanja za utrošenu struju, vodu, odvoz smeća i druge usluge ukoliko ista ne prelaze limit propisan u članu 19. stavu (3) ovog zakona.

(4) Kada u istom postupku učestvuju zastupani subjekti kao stranke sa suprotstavljenim interesima, a jedna od stranaka u tom postupku je Distrikt, Pravobranilaštvo će zastupati Distrikt.

(5) Kada u istom postupku učestvuju zastupani subjekti kao stranke sa suprotstavljenim interesima, a nijedna od stranaka u tom postupku nije Distrikt, Pravobranilaštvo neće zastupati nijedan od tih subjekata.

(6) Pri obavljanju poslova iz stava (1) ovog člana Pravobranilaštvo može pokretati i postupke protiv Distrikta te u tom slučaju ima svojstvo stranke u postupku.

Član 13
(Naknada)

- (1) Pravobranilaštvo ima pravo na naknadu troškova postupka u skladu s važećim advokatskim tarifama.
- (2) U slučaju da tarife nisu ujednačene, Pravobranilaštvo će obračunavati i potraživati iznos koji predstavlja aritmetički prosjek tarifa.
- (3) Naknada iz stava (1) ovog člana predstavlja budžetske prihode Distrikta.

Odjeljak A- Postupci pred stranim sudovima, arbitražama i drugim međunarodnim organima

Član 14
(Zastupanje u postupcima pred stranim sudovima, arbitražama i drugim međunarodnim organima)

- (1) Pravobranilaštvo preuzima zakonom određene pravne radnje i mjere za zaštitu javne imovine, imovinskih prava i interesa zastupanih subjekata i u postupcima pred stranim sudovima, arbitražama i drugim međunarodnim organima.
- (2) Ukoliko se postupak vodi pred stranim sudovima, arbitražama i drugim međunarodnim organima, pravobranilac može ovlastiti kvalifikovanu osobu koja će zastupati interese Distrikta.
- (3) U postupcima koji se vode pred stranim sudovima, arbitražama i drugim međunarodnim organima, pravobranilac može odlučiti da pored kvalifikovane osobe iz stava (2) ovog člana u postupku učestvuje i ovlašteni predstavnik Pravobranilaštva.

Odjeljak B - Posebni postupci pred sudovima

Član 15
(Ovlaštenja za pokretanja postupka pred Ustavnim sudom Bosne i Hercegovine)

Pravobranilaštvo može u ime Distrikta pokrenuti postupak ili neku drugu pravnu radnju u postupku iz odredbe člana 33b Statuta Distrikta.

Član 16
(Ovlaštenja za pokretanja postupka pred Apelacionim sudom Brčko distrikta Bosne i Hercegovine)

- (1) Kada procijeni da su javna imovina, imovinska prava i interesi Distrikta narušeni, pravobranilac može pokrenuti postupak pred Apelacionim sudom Brčko distrikta BiH:

- a) za ocjenu saglasnosti odredbi zakona Distrikta, podzakonskih akata ili bilo kojeg drugog pravnog akta bilo koje institucije Distrikta s odredbama Statuta Distrikta (ocjena statutarnosti),
- b) za ocjenu saglasnosti bilo kojeg podzakonskog akta Distrikta ili bilo kojeg drugog pravnog akta bilo koje institucije Distrikta sa bilo kojim zakonom Distrikta (ocjena zakonitosti).

Odjeljak C - Odnos Pravobranilaštva i zastupanih subjekata

Član 17

(Odnos Pravobranilaštva i Distrikta, njegovih organa i institucija kao zastupanih subjekta)

- (1) U preduzimanju pravnih radnji za zaštitu javne imovine, imovinskih prava i interesa Distrikta, njegovih organa i institucija, Pravobranilaštvo može da preduzima sve radnje koje preduzima stranka u postupku.
- (2) Odgovorna lica u organima i institucijama Distrikta dužni su da obavijeste Pravobranilaštvo o potrebi preduzimanja pravnih radnji za zaštitu javne imovine, imovinskih prava i interesa Distrikta.
- (3) Obavještenje iz stava (2) ovog člana mora biti obrazloženo i uz isto mora biti dostavljena sva potrebna dokumentacija za preduzimanje radnji iz stava (1) ovog člana.
- (4) Pravobranilaštvo, ukoliko smatra da ne treba pokrenuti postupak pred sudom ili drugim organom ili treba povući tužbu ili se odreći tužbenog zahtjeva ili prijedloga za izvršenje, priznati zahtjev protivne stranke ili zaključiti poravnanje, obavijestit će o tome subjekat koga zastupa i tražit će njegovo izjašnjenje.
- (5) Zastupani subjekat obavezan je da dostavi traženo izjašnjenje, i to u pisanoj formi, a najkasnije dva dana prije isteka roka za preduzimanje konkretne pravne radnje.
- (6) Pravobranilaštvo je obavezno da postupi po izjašnjenju zastupanog subjekta iz stava (5) ovog člana.
- (7) Izuzetno od stava (6) ovog člana, ukoliko je mišljenje Pravobranilaštva da bi trebalo izjaviti pravno sredstvo u određenoj pravnoj stvari, postupiće prema svom mišljenju.
- (8) Ukoliko Pravobranilaštvo smatra da bi se postupanjem u skladu sa izjašnjenjem iz stava (5) ovog člana očigledno nanijela imovinska šteta zastupanom subjektu koji je dao takvo izjašnjenje, o tome će bez odgađanja, u pisanoj formi, upozoriti rukovodioca zastupanog subjekta.
- (9) Ako zastupani subjekat ne dostavi pismeno izjašnjenje u roku iz stava (5) ovog člana, Pravobranilaštvo će postupiti prema svom mišljenju.

Član 18

(Odnos Pravobranilaštva i pravnih lica i preduzeća kao zastupanih subjekata)

- (1) Pravna lica koja se finansiraju u potpunosti ili pretežno iz budžeta Distrikta ili u odnosu na koja Distrikt vrši osnivačka prava i preduzeća u većinskom vlasništvu

Distrikta obavještavaju Pravobranilaštvo o potrebi preduzimanja pravnih radnji za zaštitu njihove imovine, imovinskih prava i interesa.

(2) Obavještenje iz stava (1) ovog člana mora biti obrazloženo i uz isto mora biti dostavljena sva potrebna dokumentacija za preduzimanje pravnih radnji za zaštitu imovine, imovinskih prava i interesa pravnih lica koja se finansiraju u potpunosti ili pretežno iz budžeta Distrikta ili u odnosu na koja Distrikt vrši osnivačka prava i preduzeća u većinskom vlasništvu Distrikta.

(3) Pravobranilaštvo, ukoliko smatra da ne treba pokrenuti postupak pred sudom ili drugim organom ili treba povući tužbu ili se odreći tužbenog zahtjeva ili prijedloga za izvršenje, priznati zahtjev protivne stranke ili zaključiti poravnanje, obavijestit će o tome subjekat koga zastupa i tražit će njegovo izjašnjenje.

(4) Zastupani subjekat obavezan je da dostavi traženo izjašnjenje, i to u pisanoj formi, a najkasnije dva dana prije isteka roka za preduzimanje konkretne pravne radnje.

(5) Pravobranilaštvo je obavezno da postupi po izjašnjenju zastupanog subjekta iz stava (4) ovog člana.

(6) Ukoliko Pravobranilaštvo smatra da bi se postupanjem u skladu sa izjašnjenjem iz stava (4) ovog člana očigledno nanijela imovinska šteta zastupanom subjektu koji je dao takvo izjašnjenje, o tome će bez odgađanja, u pisanoj formi, upozoriti osnivača zastupanog subjekta.

Odjeljak D- Obaveza pribavljanja mišljenja

Član 19

(Obaveza pribavljanja mišljenja)

(1) U postupku donošenja zakona i drugih propisa kojima se uređuju imovinskopravni odnosi, kao i prava i obaveze prema sredstvima u vlasništvu Distrikta i drugih subjekata iz člana 8. ovog zakona, obavezno se pribavlja mišljenje Pravobranilaštva.

(2) Subjekti iz člana 8. ovog zakona su obavezni zatražiti mišljenje prije donošenja akata i zaključivanja ugovora kojima se regulišu imovinskopravna pitanja, a posebno prije zaključivanja ugovora o kupoprodaji, zamjeni, zakupu, prijenosu na privremeno ili trajno korištenje stvari, ili sredstava uz naknadu ili bez naknade, ugovora o koncesiji, ugovora o građenju i udruživanju sredstava za građenje, ugovora o statusnim i ugovornim oblicima povezivanja preduzeća kao i drugih ugovora kojima se pribavljaju stvari ili raspolaze stvarima odnosno pravima.

(3) Kada je predmet pravnog posla ili ugovora iz stava (2) ovog člana pokretna stvar ili imovinsko pravo čija vrijednost ne prelazi 15.000,00 KM na dan utvrđivanja vrijednosti, nije obavezno pribavljanje mišljenja.

(4) Subjekti iz člana 8. ovog zakona uz zahtjev za mišljenje, dužni su dostaviti dokumentaciju potrebnu za davanje mišljenja, a zahtjev mora biti obrazložen.

Član 20

(Rokovi za dostavljanje mišljenja)

(1) Pravobranilaštvo je dužno dostaviti mišljenje najkasnije u roku od deset dana, a u naročito složenim slučajevima u roku od 15 dana, od dana prijema obrazloženog zahtjeva i potrebne dokumentacije.

(2) Izuzetno od stava (1) ovog člana, Pravobranilaštvo je dužno dostaviti mišljenje najkasnije u roku od pet dana, odnosno najkasnije u roku od deset dana u naročito složenim slučajevima, ukoliko postoje opravdani interesi, pri čemu zastupani subjekat predmet označava kao prioritet, uz posebno obrazloženje.

(3) Ukoliko Pravobranilaštvo ne dostavi mišljenje u zakonom propisanom roku, akti se mogu donijeti ili se ugovor može zaključiti bez mišljenja Pravobranilaštva.

(4) Doneseni akti i ugovori zaključeni suprotno odredbama članova koji uređuju obavezno pribavljanje mišljenja za akte i za ugovore su ništavi, osim u slučajevima kada Pravobranilaštvo ne dostavi mišljenje u roku.

Odjeljak E- Obaveza obavještavanja i dostavljanja

Član 21

(Obavezno obavještavanje, dostavljanje dokumenata i ugovora)

(1) Sudovi i drugi organi obavezni su da obavijeste Pravobranilaštvo ako u toku postupka uoče da treba preduzeti mjere za zaštitu javne imovine, imovinskih prava i interesa zastupanih subjekata.

(2) Zastupani subjekti iz člana 8. ovog zakona obavezni su da obavijeste Pravobranilaštvo o ugrožavanju i narušavanju ili osporavanju prava i stvari u svojini zastupanih subjekata, radi preduzimanja daljih pravnih radnji za koje je Pravobranilaštvo ovlašteno.

(3) Nadležni organ koji vrši obradu ili ovjeru ugovora o prometu nepokretnosti, a koji se odnose na zastupane subjekte, obavezan je da primjerak tog ugovora dostavi Pravobranilaštvu.

(4) Zastupani subjekti iz člana 8. ovog zakona obavezni su da, na zahtjev Pravobranilaštva, dostave podatke, obavještenja i spise, kao i stručno mišljenje koje je potrebno za preduzimanje radnji iz njegove nadležnosti.

(5) Pravobranilaštvo ima pravo na uvid, izdavanje dokumentacije, javnih isprava iz javnih evidencija, kopiranje isprava i drugih spisa iz svakog javnog registra, predmeta i elektronske baze podataka o stanju predmeta koje vodi sud, organi i institucije, bez plaćanja nagrade, naknade ili takse.

(6) Zastupani subjekat obavezan je da blagovremeno, na zahtjev Pravobranilaštva, dostavi tražene dokaze i podatke o stanju u predmetnoj pravnoj stvari.

(7) Odgovorna osoba u zastupanom subjektu koja ne postupi u skladu sa odredbama stavova (4) i (6) ovog člana čini težu povredu službene dužnosti.

Odjeljak F- Praćenje stanja i predlaganje mjera

Član 22

(Praćenje stanja)

Pravobranilaštvo prati i proučava pojave, pravna pitanja i probleme od značaja za vršenje svoje nadležnosti, imovinu zastupanih subjekata, primjenu zakona i drugih propisa, te obavještava Vladu Brčko distrikta Bosne i Hercegovine i druge nadležne organe i predlaže mjere za zaštitu javne imovine, imovinskih prava i interesa zastupanih subjekata i sprečavanja društveno štetnih pojava.

POGLAVLJE II - ORGANIZACIJA

Član 23 (Struktura Pravobranilaštva)

- (1) Funkciju Pravobranilaštva vrši pravobranilac.
- (2) Pravobranilac ima sedam zamjenika.
- (3) Pravobranilaštvo ima sekretara i određeni broj zaposlenih koji se utvrđuje pravilnikom o unutrašnjoj organizaciji i sistematizaciji radnih mjesta.
- (4) Pravobranilaštvo može zapošljavati određeni broj stručnih saradnika i pripravnika.

Član 24 (Ovlaštenja pravobranioca i zamjenika)

- (1) Pravobranilac predstavlja Pravobranilaštvo, rukovodi njegovim radom i vrši sva druga prava i dužnosti iz nadležnosti Pravobranilaštva propisana ovim zakonom i drugim propisima i donosi podzakonske akte kojima uređuje rad Pravobranilaštva.
- (2) Pravobranilac raspoređuje zadatke zamjenicima i daje obavezujuće opšte instrukcije u vezi sa obavljanjem dužnosti, kao i smjernice za preduzimanje postupaka i mjera u konkretnim slučajevima.
- (3) Osim obavezujućih instrukcija koje daje zamjenicima u vezi s obavljanjem njihovih dužnosti, pravobranilac može:
 - a) provoditi sve ili samo neke postupke ili radnje iz djelokruga rada zamjenika,
 - b) ovlastiti zamjenika da provede samo neke postupke ili radnje iz djelokruga rada drugog zamjenika,
 - c) ovlastiti zamjenika da preduzme konkretne radnje iz djelokruga rada pravobranioca.
- (4) Zamjenik može vršiti svaku radnju u postupku pred sudom i drugim nadležnim institucijama za koju je ovlašten pravobranilac u skladu s odredbama ovog zakona.
- (5) Ako se pravobranilac ne slaže s određenim postupkom zamjenika, dužan je da da instrukcije zamjeniku kako da postupa u konkretnom predmetu.
- (6) Ako zamjenik odbije da postupa u skladu s instrukcijama iz prethodnog stava, taj postupak preuzima pravobranilac umjesto nadležnog zamjenika ili drugi zamjenik koga odredi pravobranilac.
- (7) Zamjenici obavještavaju pravobranioca o stanju zaštite javne imovine, imovinskih prava i interesa Distrikta.
- (8) Zamjenici za svoj rad odgovaraju pravobraniocu.

Član 25 (Spriječenost pravobranioca u obavljanju funkcije)

- (1) Kada je pravobranilac odsutan ili spriječen da rukovodi Pravobranilaštvom, zamjenjuje ga zamjenik koga odredi pravobranilac.

(2) Kada je pravobranilac odsutan ili spriječen da rukovodi Pravobranilaštvom, a nije određen zamjenik koji će ga privremeno zamijeniti, pravobranioca mijenja zamjenik s najdužim iskustvom.

Član 26
(Izuzeće)

(1) Pravobranilac i zamjenik ne mogu postupati u svakoj situaciji u kojoj imaju privatni interes koji je takav da može uticati ili izgleda da može uticati na nepristrasno i objektivno vršenje njegove dužnosti.

(2) Pravobranilac odlučuje o izuzeću zamjenika, a o njegovom izuzeću Kolegij Pravobranilaštva.

Član 27
(Kolegij Pravobranilaštva)

(1) Kolegij Pravobranilaštva čine pravobranilac i zamjenici.

(2) Na Kolegiju iz stava (1) ovog člana se raspravlja o svim pitanjima iz nadležnosti Pravobranilaštva u skladu Poslovníkom o radu Pravobranilaštva.

Član 28
(Službena legitimacija)

(1) Pravobranilac i zamjenici imaju službene legitimacije, koje izdaje Pravosudna komisija Brčko distrikta Bosne i Hercegovine (u daljem tekstu: Pravosudna komisija).

(2) Oblik i izgled službene legitimacije pravobranioca i zamjenika propisuje se pravilnikom koji donosi Pravosudna komisija.

Član 29
(Polugodišnji i godišnji izvještaj)

Pravobranilaštvo dostavlja polugodišnji i godišnji izvještaj o radu Skupštini, gradonačelniku i Pravosudnoj komisiji.

DIO TREĆI- IZBOR, IMENOVANJE I VERIFIKACIJA

POGLAVLJE I – NADLEŽNOST ZA IZBOR I IMENOVANJE

Član 30
(Nadležnost za izbor pravobranioca i zamjenika)

(1) Pravosudna komisija raspisuje i objavljuje konkurs za pozicije pravobranioca i zamjenike.

(2) Konkurs se objavljuje na čitavoj teritoriji Bosne i Hercegovine, na način koji utvrdi Pravosudna komisija.

(3) Nakon provedenog javnog konkursa iz stava (1) ovog člana i postupka izbora, Pravosudna komisija imenuje pravobranioca i zamjenike.

(4) Za pravobranioca i zamjenike bit će izabrani oni kandidati koji dobiju većinu ukupnog broja glasova članova Pravosudne komisije.

(5) Prilikom izbora za pravobranioca i zamjenika Komisija mora odlučivati u punom sastavu.

Odjeljak A- Uslovi za imenovanje

Član 31

(Opšti uslovi za imenovanje pravobranioca i zamjenika)

Za pravobranioca i zamjenika može biti imenovana svaka osoba koja ispunjava sljedeće opšte uslove:

- a) da je državljanin Bosne i Hercegovine,
- b) da je zdravstveno sposoban za vršenje poslova upražnjenog radnog mjesta,
- c) da se protiv njega ne vodi krivični postupak,
- d) da nije osuđivano za krivično djelo na kaznu zatvora u trajanju dužem od šest mjeseci,
- e) da nije osuđivano za:
 - 1) krivično djelo iz oblasti korupcije,
 - 2) krivično djelo protiv pravnog saobraćaja,
 - 3) drugo krivično djelo koje ga čini nedostojnim za vršenje službe u pravosuđu,
- f) da se na tu osobu ne odnosi član IX stav (1) Ustava.

Član 32

(Posebni uslovi za imenovanje pravobranioca)

Osoba može biti izabrana za pravobranioca koja pored opštih uslova propisanih ovim zakonom ispunjava i posebne uslove, i to:

- a) završen pravni fakultet -240 ECTS ili ekvivalent,
- b) položen pravosudni ispit,
- c) najmanje pet godina radnog iskustva u radu na pravnim poslovima nakon položenog pravosudnog ispita, u nekoj od institucija pravosuđa, advokaturi ili drugim institucijama,
- d) da je osoba visokih profesionalnih i moralnih kvaliteta i da posjeduje potrebno iskustvo i stručne sposobnosti u oblasti prava.

Član 33

(Posebni uslovi za imenovanje zamjenika)

Osoba može biti izabrana za zamjenika ako pored opštih uslova propisanih zakonom ispunjava i posebne uslove, i to:

- a) završen pravni fakultet -240 ECTS ili ekvivalent,
- b) položen pravosudni ispit,

- c) ima najmanje tri godine radnog iskustva u radu na pravnim poslovima nakon položenog pravosudnog ispita, u nekoj od institucija pravosuđa, advokaturi ili drugim institucijama,
- d) je osoba visokih profesionalnih i moralnih kvaliteta i da posjeduje potrebno iskustvo i stručne sposobnosti u oblasti prava.

Odjeljak B - Kriteriji za izbor

Član 34 (Kriteriji za izbori pravobranioca i zamjenika)

- (1) Prilikom izbora pravobranioca i zamjenika, Pravosudna komisija je dužna da razmotri da li kandidat ispunjava kriterije za obavljanje dužnosti pravobranioca i zamjenika, posebno vodeći računa o:
- a) stručnom znanju i prethodnom radnom iskustvu,
 - b) pokazanim profesionalnim sposobnostima kroz rezultate koji su postignuti tokom prethodnog rada,
 - c) radnoj sposobnosti i sposobnosti pravilnog rješavanja pravnih pitanja,
 - d) ugledu i sposobnosti kandidata da nepristrasno, savjesno, marljivo, odlučno i odgovorno obavlja dužnosti na radnom mjestu za koje se njegovo postavljanje razmatra,
 - e) sposobnosti komuniciranja,
 - f) odnosu sa saradnicima i ponašanju van službe.

Član 35 (Kvalifikacioni test)

- (1) Pravosudna komisija radi provjere kriterijuma iz člana 34. tačke a) i c) ovog zakona može uvesti kvalifikaciono testiranje kandidata u pisanoj formi, koji može uključivati sljedeće oblasti:
- a) Ustavno pravo Bosne i Hercegovine,
 - b) Građansko pravo,
 - c) Građansko procesno pravo,
 - d) Upravno pravo,
 - e) Privredno pravo,
 - f) Stvarno pravo,
 - g) Evropska konvencija za zaštitu ljudskih prava i temeljnih sloboda i drugi međunarodni dokumenti, ugovori i sporazumi o ljudskim pravima čija je potpisnica Bosna i Hercegovina,
 - h) Statut Distrikta,
 - i) druga pitanja bitna za funkciju.
- (2) U slučaju da se obavlja pismeno testiranje kandidata, Pravosudna komisija obezbjeđuje da osobe koje ocjenjuju test tokom procesa ocjenjivanja ne znaju identitet osobe koja je radila test.

Član 36
(Razgovor s kandidatima)

Nijedna osoba ne može se imenovati na dužnost ukoliko se sa njom ne obavi razgovor.

Član 37
(Mišljenje o kandidatima)

Pravosudna komisija može tražiti da joj se u pisanoj formi dostave mišljenje ili preporuke od prethodnih poslodavaca o stručnim i drugim kvalifikacijama kandidata.

Član 38
(Prava kandidata)

Svaki kandidat ima pravo pregledati i prepisivati dokumentaciju konkursa u kojem učestvuje.

Član 39
(Primjena odredbi)

Pravosudna komisija primjenjuje odredbe o jednakim pravima i podjednakoj zastupljenosti u Pravobranilaštvu.

Odjeljak C- Odluka o izboru i verifikacija

Član 40
(Odluka o izboru)

- (1) Nakon provedenog postupka izbora, Pravosudna komisija donosi odluku o izboru pravobranioca i zamjenika.
- (2) Pravosudna komisija obavještava sve kandidate o odluci o izboru.

Član 41
(Verifikacija)

- (1) Odluku o izboru pravobranioca i zamjenika iz člana 40. ovog zakona, Pravosudna komisija dostavlja Skupštini na verifikaciju.
- (2) Skupština je dužna da u roku od 15 dana od dana prijema odluke o izboru pravobranioca i zamjenika, tročetinskom većinom glasova zastupnika koji su prisutni i glasaju, donese odluku o verifikaciji ili da stavi veto na izbor pravobranioca i zamjenika.
- (3) Ukoliko Skupština ne donese odluku o verifikaciji izbora pravobranioca i zamjenika ili ne stavi veto u roku iz stava (2) ovog člana, smatrat će se da je verifikacija od strane Skupštine izvršena.
- (4) Ukoliko Skupština stavi veto na izbor pravobranioca ili zamjenika, Pravosudna komisija će poništiti odluku o izboru i izabrati drugu osobu iz grupe prijavljenih

kandidata, ili će poništiti odluku o izboru i ponovo provesti proceduru izbora i imenovanja.

(5) U slučaju iz stava (4) ovog člana, postupak verifikacije se ponavlja.

Odjeljak D - Odluka o imenovanju

Član 42 (Odluka o imenovanju)

(1) Nakon verifikacije odluke o izboru od strane Skupštine u smislu odredbe člana 41. ovog zakona, Pravosudna komisija donosi odluku o imenovanju pravobranioca i zamjenika, u roku od 15 dana od dana verifikacije.

(2) Odluka o imenovanju se objavljuje u „Službenom glasniku Brčko distrikta Bosne i Hercegovine.“

Član 43 (Poništenje odluke)

(1) Pravosudna komisija može poništiti odluku o izboru i imenovanju kandidata ako nakon donošenja odluke o imenovanju, a prije nego što imenovani preuzme dužnost, dobije podatke koji bi, da su bili poznati u vrijeme donošenja odluke, predstavljali razlog da Pravosudna komisija ne donese odluku.

(2) Pravosudna komisija može, ako to smatra neophodnim, odgoditi datum preuzimanja dužnosti pravobranioca i zamjenika kako bi podatke iz stava (1) ovog člana, mogla na odgovarajući način provjeriti.

(3) U slučaju donošenja odluke iz stava (1) ovog člana, Pravosudna komisija će ponovo provesti proceduru izbora i imenovanja.

POGLAVLJE II - PREUZIMANJE DUŽNOSTI, ZAKLETVA, IMUNITET I SUKOB INTERESA

Član 44 (Preuzimanje dužnosti)

(1) Imenovani pravobranilac, odnosno zamjenik stupa na dužnost odmah poslije imenovanja, a najkasnije u roku od 15 dana od dana kada je imenovan.

(2) Ako iz razloga koji nisu opravdani izabrani kandidat ne preuzme u roku iz stava (1) ovog člana, Pravosudna komisija će poništiti odluke o izboru i imenovanju i izabrati drugu osobu iz reda prijavljenih kandidata, ili će poništiti odluke o izboru i imenovanju ponovo provesti proceduru izbora i imenovanja.

(3) U slučaju iz stava (2) ovog člana, postupak verifikacije se ponavlja.

Član 45
(Zakletva)

(1) Osoba imenovana na dužnost pravobranioca i zamjenika daje zakletvu pred predsjednikom Komisije, te potpisuje zakletvu.

(2) Tekst zakletve je sljedeći: „Izjavljujem da ću obavljati svoju dužnost u skladu sa Statutom i zakonima Brčko distrikta Bosne i Hercegovine, zakonima i Ustavom Bosne i Hercegovine, da ću obavljati dužnosti po svom najboljem znanju, savjesno, odgovorno i nepristrano radi provođenja vladavine zakona, i da ću štiti javnu imovinu, imovinska prava i interese Brčko distrikta Bosne i Hercegovine.“

Član 46
(Imunitet)

(1) Pravobranilac i zamjenik ne mogu biti pozvani na krivičnu niti građanskopravnu odgovornost za izvršene radnje, date izjave ili mišljenja koje se odnose ili neposredno proizlaze iz obavljanja službene dužnosti u Pravobranilaštvu.

(2) Ovo ne znači opšte pokriće imunitetom od svake krivične ili građanske odgovornosti za djela koja se ne odnose ili neposredno ne proizlaze iz obavljanja službene dužnosti u Pravobranilaštvu.

Odjeljak A- Sukob interesa

Član 47
(Standardi nespojivosti funkcija)

(1) Pravobranilac je dužan održavati integritet, nezavisnost i profesionalizam Pravobranilaštva.

(2) U svim okolnostima, nosioci funkcija su dužni da poštuju i podržavaju vladavinu zakona, sprečavaju sumnju u svoje neprilično ponašanje i postupaju na način koji osigurava povjerenje javnosti u integritet, nezavisnost i profesionalizam Pravobranilaštva.

(3) Pravobranilac i zamjenik ne mogu biti skupštinski zastupnici, obavljati političke i izvršne funkcije ili druge dužnosti i funkcije koje bi mogle da utiču na njihovu nezavisnost u radu ili njihov ugled ili ugled njihovog zanimanja.

(4) Pravobranilac i zamjenici ne mogu biti članovi političkih stranaka ili na bilo koji način biti uključeni u neku političku aktivnost a posebno ne mogu biti članovi ili obavljati bilo koju dužnost u tijelima političkih partija, udruženja ili fondacija povezanih s političkim partijama, niti mogu učestvovati u javnim aktivnostima političke partije.

(5) Pravobranilac i zamjenici ne smiju biti članovi organizacije za koju znaju da vrši diskriminaciju na osnovu rase, spola, seksualnih sklonosti, vjeroispovijesti, etničkog ili nacionalnog porijekla i dužni su podnijeti ostavku na članstvo u takvoj organizaciji kada saznaju za takvo djelovanje.

(6) Pravobranilac i zamjenici ne mogu biti članovi izvršnog ili nadzornog odbora javnog ili privatnog preduzeća ili drugog pravnog lica.

(7) Pravobranilac i zamjenici mogu primiti naknadu ili nadoknadu troškova za aktivnosti van oblasti svog rada određene ovim zakonom, u skladu s etičkim kodeksom koji je donijela Pravosudna komisija.

(8) Bračni drug pravobranioca ili zamjenika u direktnom srodstvu u prvoj liniji i srodstvu u bočnoj liniji do četvrtog stepena, kao i do drugog stepena tazbinskog srodstva, ne može biti zaposleni u Pravobranilaštvu.

Član 48

(Izjava o sukobu interesa)

Pravobranilac i zamjenik potpisuju izjavu o nepostojanju sukoba interesa po preuzimanju dužnosti u Pravobranilaštvu.

Član 49

(Mišljenje o sukobu interesa za pravobranioca i zamjenike)

(1) Pravobranilac i zamjenik mogu tražiti od Pravosudne komisije mišljenje o tome da li su njegove aktivnosti spojive sa njegovom dužnosti i odredbama ovog zakona.

(2) Zahtjev iz stava (1) ovog člana treba da sadrži detalje o aktivnostima o kojima je riječ.

(3) Pravosudna komisija će po prijemu zahtjeva iz stava (1) ovog člana u razumnom roku dostaviti odgovor u pisanoj formi, koji će biti obavezujućeg karaktera.

Član 50

(Odnos sa posebnim zakonom)

Odredbe koje se odnose na sukob interesa propisane ovim zakonom, ne utiču na obaveze koje za pravobranioca i zamjenika proističu iz Zakona o sprečavanju sukoba interesa u institucijama Brčko distrikta Bosne i Hercegovine.

Odjeljak B - Prijava prihoda

Član 51

(Finansijski izvještaj)

Pravobranilac i zamjenici pojedinačno podnose na uvid finansijski izvještaj u skladu sa Zakonom o sprečavanju sukoba interesa u institucijama Brčko distrikta BiH Skupštini i Komisiji za odlučivanje o sukobu interesa Brčko distrikta BiH.

Odjeljak C- Funkcija

Član 52 (Trajanje funkcije)

- (1) Pravobranilac se imenuje na period od četiri godine i može biti ponovo imenovan.
- (2) Zamjenici se imenuju bez vremenskog ograničenja trajanja funkcije.

Član 53 (Razlozi za prestanak funkcije pravobranioca)

- (1) Pravobraniocu funkcija prestaje:
 - a) na sopstveni zahtjev,
 - b) kada navršši 70 godina,
 - c) kad istekne period na koji je imenovan,
 - d) u slučaju njegovog razrješenja od strane Pravosudne komisije kao rezultat disciplinskog postupka,
 - e) ako se dokaže na osnovu medicinske dokumentacije da je trajno izgubio radnu sposobnost za vršenje funkcije,
 - f) ako je osuđen za krivično djelo na kaznu zatvora osim za krivična djela protiv sigurnosti javnog saobraćaja ili ako je osuđen za krivično djelo koji ga čini nepodobnim za obavljanje dužnosti.
- (2) Do prestanka službe u slučajevima iz stava (1) ovog člana dolazi:
 1. u slučaju iz tačke a) -danom donošenja konačne odluke o prestanku funkcije,
 2. u slučaju iz tačke b) -navršenjem godina života,
 3. u slučaju iz tačke c)-istekom perioda na koje je imenovan,
 4. u slučaju iz tačke d)- danom donošenja konačne odluke o razrješenju,
 5. u slučaju iz tačke e)- danom donošenja konačne odluke o razrješenju,
 6. u slučaju iz tačke f)- danom pravosnažnosti krivične presude.
- (3) Pravobranilac čija je funkcija prestala nastaviti će da obavlja dužnost sa svim pravima i obavezama koje ona nosi dok se ne imenuje novi pravobranilac, osim u slučajevima iz stava (1) ovog člana, tački d), e) i f).
- (4) Odluke iz stavova (2) i (3) ovog člana donosi Pravosudna komisija.

Član 54
(Razlozi za prestanak funkcije zamjenika)

Funkcija zamjenika prestaje:

- a) na sopstveni zahtjev,
- b) kada navršši 65 godina,
- c) u slučaju njegovog razrješenja od strane Pravosudne komisije kao rezultat disciplinskog postupka,
- d) ako se dokaže na osnovu medicinske dokumentacije da je trajno izgubio radnu sposobnost za vršenje funkcije,
- e) ako je osuđen za krivično djelo na kaznu zatvora osim za krivična djela protiv sigurnosti javnog saobraćaja ili ako je osuđen za krivično djelo koji ga čini nepodobnim za obavljanje dužnosti.

(2) Do prestanka službe u slučajevima iz stava (1) ovog člana dolazi:

1. u slučaju iz tačke a) -danom donošenja konačne odluke o prestanku funkcije,
2. u slučaju iz tačke b) -navršenjem godina života,
3. u slučaju iz tačke c)- danom donošenja konačne odluke o razrješenju,
4. u slučaju iz tačke d)- danom donošenja konačne odluke o razrješenju,
5. u slučaju iz tačke e)- danom pravosnažnosti krivične presude.

(3) Zamjenik čija je funkcija prestala nastaviti će da obavlja dužnost sa svim pravima i obavezama koje ona nosi dok se ne imenuje novi zamjenik, osim u slučajevima iz stava (1) ovog člana, tački c), d) i e).

(4) Odluke iz stavova (2) i (3) ovog člana donosi Pravosudna komisija.

DIO ČETVRTI - SUSPENZIJA I DISCIPLINSKA ODGOVORNOST

POGLAVLJE I-SUSPENZIJA

Odjeljak A. Pokretanje, odluka i trajanje

Član 55
(Razlozi za suspenziju)

(1) Rješenjem Pravosudne komisije pravobranilac ili zamjenik se obavežno suspenduje, ako je:

- a) protiv njega potvrđena optužnica za krivično djelo počinjeno u vršenju službene dužnosti ili druge odgovorne dužnosti,
- b) protiv njega potvrđena optužnica za krivično djelo za koje se može izreći kazna zatvora u trajanju od najmanje tri godine,

c) protiv njega pokrenut disciplinski postupak ili postupak razrješenja, a razlozi su takve prirode da bi obavljanjem funkcije, dok traje taj postupak, mogao štetiti interesima institucije,

d) protiv njega određen pritvor u istrazi u krivičnom postupku,

e) izrečena mjera zabrane rada na poslovima do okončanja krivičnog postupka, a nije određen pritvor.

(2) Suspenzija traje do donošenja pravosnažne presude u krivičnom postupku, donošenja konačne odluke u disciplinskom postupku, odnosno do isteka pritvora ili ukidanje mjere zabrane rada.

Član 56

(Pokretanje postupka za suspenziju)

(1) Predsjednik Pravosudne komisije pokreće postupak suspenzije pravobranioca.

(2) Postupak suspenzije zamjenika pokreće pravobranilac.

Član 57

(Odluka o suspenziji)

(1) Odluku o suspenziji donosi Pravosudna komisija.

(2) Protiv Odluke iz stava (1) može pokrenuti sudski postupak pred Osnovnim sudom Brčko distrikta Bosne i Hercegovine.

Poglavlje II- Disciplinska odgovornost

Član 58

(Provođenje disciplinskih postupaka)

Pravosudna komisija može provesti disciplinski postupak ili razriješiti dužnosti pravobranioca i zamjenika samo pod uslovima i prema proceduri koji su propisani ovim zakonom.

Član 59

(Opšte odredbe o disciplinskoj odgovornosti za disciplinske prekršaje)

Pravobranilac i zamjenik su disciplinski odgovorni za disciplinske prekršaje propisane ovim zakonom.

Odjeljak A - Disciplinski prekršaji i mjere

Član 60

(Disciplinski prekršaji)

(1) Disciplinski prekršaji su:

a) očigledno kršenje svojih obaveza predviđenih zakonom,

- b) odavanje neovlaštenim osobama povjerljivih informacija koje proizlaze iz vršenja dužnosti u Pravobranilaštvu,
- c) prihvatanje poklona ili nagrade čija je namjena neprimjereno izvršavanje dužnosti u Pravobranilaštvu, uključujući i slučajeve kada poklon ili nagrada samo odaju utisak neprimjerenog uticaja,
- d) korištenje dužnosti pravobranioca i zamjenika kako bi se pribavile neopravdane koristi za sebe ili druge osobe,
- e) propuštanje da traži svoje izuzeće od postupanja po predmetima kada postoji sukob interesa,
- f) davanje bilo kakvih komentara, dok se predmet ne riješi na sudu, za koje se opravdano može očekivati da mogu ometati ili štetiti pravičnom postupku ili suđenju,
- h) namjerno davanje lažne izjave, obmanjive ili nedovoljne informacije u vezi s prijavama za radno mjesto, disciplinskim stvarima, pitanjima unapređenja i napredovanja u službi ili bilo kojim drugim pitanjima koja su u nadležnosti Komisije,
- i) ponašanje u sudu i izvan njega koje šteti ugledu Pravobranilaštva, pravobranioca i zamjenika.

Član 61 (Vrste disciplinskih mjera)

- (1) Disciplinska komisija može izreći jednu ili više slijedećih disciplinskih mjera:
- a) pismenu opomenu koja se javno ne objavljuje,
 - b) javnu opomenu,
 - c) novčana kazna u visini dvadeset posto ukupne plate isplaćene pravobraniocu ili zamjeniku, u mjesecu u kojem je kazna izrečena, a koja se može izreći u trajanju od jednog do šest mjeseci,
 - d) razrješenje s funkcije.

Član 62 (Principi za određivanje mjera)

- (1) Kod izricanja disciplinskih mjera mora se rukovoditi principom proporcionalnosti.
- (2) Prije izricanja mjera za disciplinske prekršaje, disciplinske komisije uzimaju u obzir slijedeće činjenice:
- a) broj i težinu učinjenog disciplinskog prekršaja i njegove posljedice,
 - b) stepen odgovornosti,
 - c) okolnosti pod kojima je disciplinski prekršaj učinjen,
 - d) dosadašnji rad i ponašanje učinioca prekršaja, i
 - e) sve druge okolnosti koje mogu utjecati na odluku o težini i vrsti disciplinske mjere, uključujući stepen kajanja i/ili saradnje koju je pravobranilac ili zamjenik pokazao tokom disciplinskog postupka.
- (3) Disciplinska mjera razrješenja s funkcije određuje se samo u slučajevima kada je utvrđen disciplinski prekršaj, a iz težine prekršaja je jasno da je prekršilac nepodoban ili nedostojan da dalje vrši funkciju.

Odjeljak B – Disciplinski postupak

Član 63

(Organi za vođenje disciplinskog postupka)

(1) Organi za vođenje disciplinskog postupka su:

- a) disciplinska komisija,
- b) disciplinski tužilac.

Član 64

(Disciplinska komisija)

(1) Disciplinska komisija je sastavljena od tri člana, od kojih su dva člana iz Pravosudne komisije a jedan član iz Pravobranilaštva odnosno pravobranilac ili zamjenik i odražava sastav stanovništva.

(2) Disciplinska komisija utvrđuje disciplinsku odgovornost i izriče mjere.

(3) Članove disciplinske komisije imenuje Pravosudna komisija na period od dvije godine i mogu biti ponovo imenovani.

(4) Ukoliko kod nekog od članova komisije iz stava (1) ovog člana postoji razlog za izuzeće, Pravosudna komisija će za taj disciplinski postupak imenovati drugog člana.

Član 65

(Disciplinski tužilac)

(1) Disciplinskog tužioca imenuje Pravosudna komisija na period od dvije godine i može biti ponovo imenovan.

(2) Za disciplinskog tužioca može biti imenovano lice iz reda zaposlenika pravosuđa sa položenim pravosudnim ispitom i najmanje tri godine radnog iskustva nakon položenog pravosudnog ispita.

(3) Ukoliko postoji razlog za izuzeće disciplinskog tužioca, Pravosudna komisija će za taj disciplinski postupak imenovati drugog disciplinskog tužioca.

Član 66

(Disciplinski postupak)

(1) Disciplinski postupak pokreće se zahtjevom za pokretanje disciplinskog postupka koji disciplinski tužilac podnosi disciplinskoj komisiji.

(2) O disciplinskoj odgovornosti odlučuje disciplinska komisija odlukom.

(3) Protiv odluke disciplinske komisije može se izjaviti žalba Pravosudnoj komisiji u roku od osam dana od dana prijema odluke.

(4) Odluka Pravosudne komisije o žalbi iz stava (3) je konačna i protiv iste se može pokrenuti postupak pred Osnovnim sudom Brčko distrikta BiH.

Član 67
(Vođenje disciplinskog postupka)

- (1) Disciplinski postupak uređuje se posebnim pravilnikom o disciplinskoj odgovornosti pravobranioca i zamjenika, koji donosi Pravosudna komisija.
- (2) Disciplinski postupak rukovodi se sljedećim načelima:
 - a) presumpcija nevinosti,
 - b) pravo na odbranu,
 - c) hitnost u postupanju,
 - d) zakonitost postupka,
 - e) srazmjernost disciplinskog postupka i povrede službene dužnosti.

Član 68
(Primjena drugih propisa)

- (1) U disciplinskom postupku koji se vodi u skladu s odredbama ovog zakona, na pitanja koja nisu regulisana, shodno se primjenjuju načela i odredbe Zakona o upravnom postupku Brčko distrikta Bosne i Hercegovine.

Član 69
(Zastara pokretanja i vođenja postupka)

- (1) Pravo na pokretanje postupka zastarijeva u roku od jedne godine od dana saznanja za počinjenu povredu i počinitelja, a najkasnije u roku od četiri godine od dana kada je povreda učinjena.
- (2) Ukoliko u roku od dvije godine od dana pokretanja postupka za povrede iz stava (1) ovog člana ne bude donesena konačna odluka, postupak se obustavlja zbog zastare vođenja postupka.

Član 70
(Vođenje evidencije i objavljivanje konačnih disciplinskih odluka)

- (1) Pravosudna Komisija vodi evidenciju o svim disciplinskim postupcima i izrečenim disciplinskim mjerama.
- (2) Disciplinska mjera razrješenja s dužnosti objavljuje se u "Službenom glasniku Brčko distrikta Bosne i Hercegovine."

DIO PETI - OSTALI ZAPOSLENI

Član 71
(Sekretar)

- (1) Pravobranilaštvo ima sekretara.
- (2) Sekretar se imenuje na period od četiri godine i može biti ponovo imenovan.

(3) Za sekretara suda može biti imenovana osoba koja je diplomirani pravnik, s položenim pravosudnim ispitom i najmanje dvije godine radnog iskustva na pravnim poslovima nakon položenog pravosudnog ispita.

(4) Dužnosti sekretara se sastoje u pružanju pomoći pravobraniocu, zamjenicima, u obavljanju njihovih dužnosti i izvršavanju svih pravnih, stručnih, finansijskih, računovodstvenih i administrativnih dužnosti u nadležnosti Pravobranilaštva.

Član 72 (Stručni saradnici)

(1) Pravobranilaštvo ima stručne saradnike čiji se broj utvrđuje pravilnikom o unutrašnjoj organizaciji i sistematizaciji radnih mjesta koji donosi pravobranilac.

(2) Za stručnog saradnika pravobranioca može biti primljen diplomirani pravnik s položenim pravosudnim ispitom.

Član 73 (Pripravnici)

Pravobranilaštvo može zaposliti pripravnike u skladu s Pravilnikom o unutrašnjoj organizaciji i sistematizaciji radnih mjesta.

Član 74 (Izbor i radnopravni status)

Postupak izbora i radnopravni status službenika i namještenika u Pravobranilaštvu regulisan je Zakonom o službenicima i namještenicima u pravosuđu Brčko distrikta Bosne i Hercegovine.

DIO ŠESTI - BUDŽET, PLATE, NAKNADE I SREDSTVA RADA PRAVOBRANILAŠTVA

Član 75 (Plate i druge naknade)

(1) Plata i druge naknade pravobranioca i zamjenika propisuju se posebnim zakonom.

(2) Propisi kojima se regulišu plate i druge naknade službenika i namještenika zaposlenih u pravosuđu Distrikta primjenjuju se i na službenike i namještenike u Pravobranilaštvu.

(3) Pravosudna komisija donosi odluku o plati za pravobranioca, zamjenika i službenike i namještenike zaposlene u Pravobranilaštvu.

Član 76
(Sredstva za rad Pravobranilaštva)

- (1) Distrikt je obavezan da obezbijedi neophodnu finansijsku i svaku drugu podršku kako bi se obezbijedilo nesmetano i pravilno funkcionisanje Pravobranilaštva.
- (2) Pravobranilaštvo ima jasno izdvojen i prikazan dio budžeta u okviru budžeta pravosuđa Distrikta.

Član 77
(Budžet Pravobranilaštva)

- (1) U propisanoj proceduri usvajanja Budžeta pravobranilac sačinjava inicijalni prijedlog budžeta Pravobranilaštva, koji potom dostavljaju Pravosudnoj komisiji radi utvrđivanja konačnog prijedloga dijela budžeta za institucije pravosuđa u Distriktu.
- (2) Pravobranilac ima pravo prisustvovati sjednicama Skupštine i njenih odgovarajućih tijela (odbori, komisije i sl.) i zastupati predloženi budžet kad god se vodi rasprava i odlučuje o pitanjima vezanim za budžet, a koja se odnose na Pravobranilaštvo.
- (3) Pravobranilac je nadležan i odgovoran za izvršenje budžeta.

DIO SEDMI - PRELAZNE I ZAVRŠNE ODREDBE

Član 78
(Shodna primjena drugih propisa)

Na pitanja o pravima i obavezama iz radnog odnosa pravobranioca i zamjenika koja nisu regulisana ovim zakonom primjenjuju se propisi o radnim odnosima zaposlenih u pravosuđu Distrikta.

Član 79
(Podzakonski akti)

- (1) Pravobranilac će u roku od 60 dana od dana stupanja na snagu ovog zakona donijeti Pravilnik o unutrašnjoj organizaciji i sistematizaciji radnih mjesta u Pravobranilaštvu, kao i sve druge podzakonske akte u skladu sa ovim i drugim posebnim zakonima, na koje saglasnost daje Pravosudna komisija.
- (2) Pravosudna komisija će u roku od 60 dana od dana stupanja na snagu ovog zakona donijeti:
 - a) propis iz člana 28 stav (2) ovog zakona,
 - b) propis iz člana 67 stav (1) ovog zakona.
- (3) Podzakonski akti koji su važili do donošenja ovog zakona, ostaju u primjeni do donošenja podzakonskih akata iz stavova (1) i (2) ovog člana, osim ukoliko su u suprotnosti sa ovim zakonom.

Član 80
(Prestanak važenja)

Danom stupanja na snagu ovog zakona prestaje da važi Zakon o Pravobranilaštvu Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 18/20-prečišćeni tekst).

Član 81
(Stupanje na snagu)

Ovaj zakon stupa na snagu osmog dana od dana objavljivanja u „Službenom glasniku Brčko distrikta Bosne i Hercegovine.“

Broj:
Brčko, . godine

PREDSJEDNIK
SKUPŠTINE BRČKO DISTRIKTA BiH

Mr. sci. Siniša Milić